



Pledpierla – In 10 ans

„1, 2, 3, 4...“, od eau a las mattas da visavi chi saglian culla corda da saglir. Eau sun sün mieu let e leg aint il cudesch ch’eau d’he imprasto hoz da la biblioteca. La fnestra da mia staunza es avierta, eau d’he fadia da’m concentrer sün quist cudesch nouv. Quaunt gugent gess eau uossa vi tar las mattas a dumander sch’eau possa giuver cun ellas. Perque ch’eau d’he gieu üna granda dispütta cun mia mamma, nu poss eau fer giò quist marcaldi zievamezdi. Que am pera magari tuct! Ma cunter la volunted da mia mamma nu’s riva da fer ünguotta. „Silia, vè giò’n chadafö, tü stust svelt cuorrer per me vi’l Volg!“ Cun pocha vögla vegn eau svelt giò in chadafö. Lo am schmacha mia mamma in maun üna chavagna e raps. „Tü stust cumprer duos liters lat, ün töch chaschöl, il pü gugent Tilsiter e painch. Ma fo svelt, perche cha hoz serra il Volg già a las quatter. Tü hest temp be aucha ün quart d’ura.“ Eau tir svelt aint las s-charpas, disch chau, vegn our da porta e cumainz a cuorrer. Eau nu riv dalöntschi, cha las curagias da mias s-charpas s’évan darcho. Eau m’inchambüerl sur mieus egens peis. Per furtüna sun eau güst auncha buna da guarder ch’eau nu crouda sül catram da nossa via, dimpersè am plach illa strivla d’erva dasper la via. Eau stun sü e bad cha our da mieu schnuogl culla saung. Eau nu se però perche - l’erva vess bain dad esser lamma. Eau stögl esser crudeda sün qualchosa dür. Dimena cumainz eau a tschercher aint ill’erva, lo inua ch’eau sun crudeda. Eau nu vez ünguotta, niauncha ün crappin. Ma spetta, schi, cò es qualchosa chi glüscha cotschen. Eau am sgob per guarder che cha que es e stögl stumpler davent ün pô l’erva per ch’eau vezza che cha que es. Que es ün apparatin chi glüscha in ün bel cotschen. Eau al vuless piglier sü, ma cur cha mieus mauns al tuochan, cumainza’l a glüscher da que mellan singuler ed aunz ch’eau inclegia la situaziun, vain ün vent terribel ferm chi’m bütta directamaing darcho giò per terra. Cur cha’l vent es darcho davent, am volv eau be plaunin. Tuot am fo mel ed eau vez ch’eau sun tuot da merda. Eau d’he flachs d’erva e terra süllas chotschas e saung. Mamma vain sgür gritta, sch’ella am vezza uschè asera e las cumpras i’l Volg poss eau uossa eir güst schmancher. Quel es nempe sgür eir già serro.

Che es vairamaing capito cun me? Eau stun sü plaunet e guard intuorn. La cuntredgia guarda our simila scu quella ch’eau cugnuosch, la via maistra e las chesas guardan our ün pô scu nossas. Sün quista via ho que però bger dapüs autos, ils pros a l’orizont sun eir bod listess, be am peran els d’esser bgerun pü

pitschens. Ed eir las chesas sun differentas. Ellas sun bger pü modernas, grandas ed insomma, que am pera cha que hegia bger dapüssas. Eau am volv e vez üna chesa chi guarda our simila scu la nossa. Uossa am volv eau e guard intuorn auncha ün mumaint. Cò vez eau a gnir incunter ad üna duonna cun üna charrozzina d'iffaunts. Eau vegn incunter. „Bun di. La poss eau dumander qualchosa? Inua sun eau cò?“ La duonna am examinescha da pè a cho. Ella stüdgia üna pezza che ch'ella desss respunder. Que bad eau be precis. Alura am respuond'la, ch'EAU saja cò a S-chanf ed am dumanda, scha saja tuot in uorden cun me.

„A S-chanf??? Que nu po esser! Que es absolutamaing impussibel! A tuots cas brich...!“ Eau sbreg bod da l'anguoscha. Uossa bad eau cha la duonna guarda darcho sün me ed eau guard tuot schockeda sün ella – üna duonna attractiva e simpatica. Ella ho ögls blovs, precis scu eau e chavels blonds scu ils mieus. Que saregia il motiv ch'ella m'observa uschè precis. Eau sun auncha adüna tuot confusa, ma listess la dumand eau cu ch'ella hegia nom. „EAU sun Silia e tü?“ Che situaziun divertenta, quista duonna ed eau vains il listess nom. „EAU d'he eir nom Silia.“

Silia am guarda tuot schockeda. „Es tuot inuorden cun Ella?“, la dumandi. Ella do be dal cho e'm do segn cul maun ch'EAU dessa gnir cun ella. Eau la chamin zieva. Üngüna nu disch pled.

Perche ho quista duonna reagieu da möd uschè schoco, cur ch'ella ho udieu ch'eir eau d'he nom Silia? Diversas duonnas haun nom Silia.

In quist mumaint am vegnan adimaint la chavagna culs raps e l' apparatin. Ohà, mia chavagna! „Be ün mumaint“, clami currind svelt inavous! Per furtüna - la chavagna es auncha adüna lo. Eau pigl svelt sü mia chavagna e vez cha l'apparatin es aint illa chavagna. Pücu facil saro'l svulo cul vent illa chavagna. Uossa fatschi però chammas e cuor a tuot pudair darcho inavous tar la duonna. Ella am spetta. Eau cuor vi tar ella. „Quaunt veglia est tü, matta?“ Eau respuond tuot our d'fled, ch'EAU saja 15 ans veglia. Silia dvainta sblechischma. „Es que pussibel...?“, repeta ella adüna darcho. Ella chamina inavaunt cun sia charrozzina e squassa il cho. Eau nu riv bod pü zieva ad ella, perche ch'ella chamina adüna pü svelt. Davaunt la chesa chi guarda our simila scu mia, sto ella salda. Uossa piglia Silia our da sia tas-cha üna clef ed evra la porta. Cuaint guarda que our bod listess scu tar me a chesa. Silia ed eau giains in chadafö. Ella am dumanda, sch'EAU vögli baiver qualchosa. Eau sgualat il cho e vegn vi tar la charrozzina.

Silia l'ho pigliada cun se in chadafö. Our da la charrozza am guarda incunter ün poppin. La duonna piglia l'iffaunt sün bratsch e vo illa stüva. Eau la vegn zieva. Ella as tschainta sülla pultruna e tschegna da gnir a tschanter dasper ella.

Dandettamaing sto Silia però darcho sü e vo vi tar üna cumoda. Lo piglia ella our ün album da fotografias. Ella as tschainta darcho sper me ed evra l'album. „Tü am perast uschè cuntschainta. Eau craj ch'eu hegia guardo our bod listess scu tü cur ch'eu d'eira 15 ans veglia!“ Uossa evra ella l'album e già sülla prüma pagina am vain que consciaint! A nu do üngüns dubis - que sun eu!

Nussas duos clappains bod ün cuolp da cour. „Q...q...que nu po esser!“, disch ella. „Cu est gnida no cò?“ Eau oz las spedlas. Ma cò am vain adimaint l'apparatin illa chavagna. Eau stun sü e vegn a piglier la chavagna. „Eau craj cha que hegia da chefer cun quista maschinina.“ Eau al pigli our e vez pür uossa cha'd es sü ün numer. An 2025. Sun eu riveda i'l an 2025? Eau dun l'apparatin a Silia.

In ün möd u l'oter sun eu sgür riveda no cò cun quist apparatin. Que voul eir dir cha quista Silia es 25 ans veglia! „Tü est eu ed eu sun tü. Be cha tü est 10 ans pü veglia!“ Silia fo ögliuns. „Forsa, scha tü tuochast quist apparatin, rivast darcho in tieu temp.“, disch ella.

Eau dun dal cho e nussas piglians cumgio ed ans dains üna brancleda. Prubabelmaing nu'ns vzaronsa pü. Silia m'accompagna davaunt porta, eu guard intuorn auncha ün'ultima vouta, tegn ferm la chavagna e tuoch cul maun l'apparatin chi cumainza darcho a glüschir da que mellan. Darcho badi ün vent terribel e pamfati croud eu per terra.

„Uau, eu sun darcho a chesa.“

L'apparatin es davent.

Il prüm suni ün pô trista, ma alura guard eu süll'ura e vez cha sun passos be tschinch minuts. Eau stun eu sü e cumainz a cuorrer cun mia chavagna vi vers il Volg.